

Datum objave: 07.04.2010. godine

Na osnovu tačke I. Odluke o usvajanju Programa utroška sredstava sa kriterijima raspodjele sredstava tekućih transfera Federalnog ministarstva obrazovanja i nauke utvrđenih Budžetom Federacije Bosne i Hercegovine za 2010. godinu ("Službene novine Federacije BiH", broj 81/09), Federalno ministarstvo obrazovanja i nauke, r a s p i s u j e

K O N K U R S

za finansiranje/sufinansiranje naučnoistraživačkih projekata u Federaciji Bosne i Hercegovine u 2010. godini

1. Konkurs se raspisuje za finansiranje/sufinansiranje naučnoistraživačkih projekata koji predstavljaju izvor novih naučnih ideja i saznanja i doprinose razvoju naučne misli tj. za fundamentalna i primijenjena istraživanja, kao i posebna istraživanja od interesa za Federaciju Bosne i Hercegovine.
2. Naučnoistraživačke projekte mogu prijaviti:
 - § naučnoistraživački instituti,
 - § univerziteti,
 - § Akademija nauka i umjetnosti BiH, i
 - § druga pravna lica registrovana za obavljanje naučnoistraživačkog rada. (izuzev fakulteta, akademija i drugih organizacionih jedinica visokoškolskih ustanova koji svoje aplikacije podnose isključivo putem matičnih univerziteta)
3. Institucije koje podnose prijavu moraju raspolagati naučnoistraživačkim kadrom, naučnoistraživačkom infrastrukturom i opremom koja omogućava realizaciju projekta i postizanje utvrđenih ciljeva.

Sredstva se mogu koristiti:

- § za finansiranje rada istraživača,
- § za materijalne troškove projekta,
- § za usluge neophodne za realizaciju projekta prema finansijskom planu koji ne uključuje matičnu instituciju kao troškovni element.

Projekti mogu biti u trajanju do 1 (jedne) godine.

4. Podnijeta prijava se sastoji iz dva dijela. Prvi dio prijave su podaci o podobnosti naučnoistraživačkog pravnog lica, te voditelja/voditeljice projekta i teme projekta, a drugi dio prijave sadrži opis i plan projekta (cilj projekta, učesnici projekta – biografija, bibliografija, saglasnosti za učešće u projektu, metodologija istraživanja, rokovi, očekivani rezultati, detaljan vremenski okvir realizacije projekta i detaljan finansijski plan razrađen po mjesecima, izjava o eventualnom sufinansiranju). Savjet za nauku Federalnog ministarstva obrazovanja i nauke izvršit će ocjenu naučnog sadržaja podnijetih prijava u pogledu podobnosti, originalnosti, aktuelnosti, kvaliteta predloženih istraživanja, vrijednosti očekivanih rezultata, podobnosti podnosioca prijave

i voditelja/voditeljice projekta, rokova, vremenskog okvira realizacije i ukupne cijene projekta.

Drugi dio prijave bit će analiziran samo kod onih prijava koje zadovoljavaju propisane kriterije iz prvog dijela.

5. Voditelj/voditeljica projekta mora biti državljanin Bosne i Hercegovine sa prebivalištem u Federaciji Bosne i Hercegovine, naučni radnik/radnica sa naučnim stepenom doktora nauka iz oblasti u koju spada projekat, koji/koja ima najmanje 3 (tri) naučna rada objavljena u posljednjih 5 godina ili 5 (pet) radova bez vremenskih ograničenja u referentnim časopisima za tu naučnu oblast i „proceedings-ima“- zbornik radova sa referentnih konferencija. Dokaz o tome prilaže se uz konkursnu prijavu u vidu ispisa sa interneta, fotokopije rada ili separata rada (pri čemu je iz priloženog moguće utvrditi kada je i gdje rad objavljen).
Voditelj/voditeljica projekta i institucija koja podnosi prijavu moraju biti upisani u Registar naučnih institucija, naučnog kadra, naučnih projekata i infrastrukturnih ulaganja u Federaciji Bosne i Hercegovine (<http://registar.nub.ba>).
6. U svojstvu voditelja/voditeljice projekta ne može biti angažiran penzionisani naučni radnik/radnica, izuzev članova redovnog radnog sastava Akademije nauka i umjetnosti Bosne i Hercegovine i profesora emeritusa. Penzionisani naučni radnici/radnice mogu se angažirati u svojstvu člana tima ili konsultanta, odnosno vanjskog saradnika/saradnice. Lica koja u svojstvu voditelja/voditeljice projekta nisu uspješno završila projekat i/ili opravdala dodijeljena sredstva od strane Federalnog ministarstva obrazovanja i nauke po prethodno objavljenim konkursima, a bili su u obavezi to učiniti, ne mogu se angažirati ni u kakvom svojstvu.
7. Naučnoistraživački tim minimalno mora biti sastavljen od voditelja/voditeljice projekta i jednog mladog istraživača/ice do 32 godine starosti koji/a nema stepen doktora nauka u trenutku podnošenja prijave.
Maksimalan iznos odobrenih sredstava po projektu može iznositi do 25.000,00 KM za projekte u oblasti tehničkih, biotehničkih i prirodnih nauka, te biomedicine i zdravstva, a do 15.000,00 KM za projekte u oblasti društvenih i humanističkih nauka.
Izuzetno, Savjet za nauku može, obzirom na značaj projekta, a na detaljno obrazložen zahtjev podnosioca, predložiti odobravanje većeg iznosa za njegovo finansiranje/sufinansiranje.
U budžetu projekta za rad članova tima, konsultanata i vanjskih saradnika/saradnica moguće je planirati u bruto iznosu maksimalno do 50% sredstava.
Federalno ministarstvo obrazovanja i nauke će sa institucijama čiji projekti budu pozitivno ocijenjeni i prihvaćeni potpisati ugovor o finansiranju/sufinansiranju.
U slučaju da u toku realizacije konkursa ili projekta budu odobrena sredstva za njegovo finansiranje/sufinansiranje iz drugih izvora koji nisu navedeni u prijavi, Federalno ministarstvo obrazovanja i nauke zadržava pravo da umanja odobreni iznos za iznos tih sredstava.
8. Prilikom izbora projekata, prednost će imati projekti:
 - § čiji voditelj/voditeljica imaju objavljene radove u časopisima obuhvaćenim sa „Web of Science“ (baze CC, SCI EXPANDED i sl.) i „proceedings-ima“- zbornicima radova sa referentnih konferencija,
 - § koji uključuju naučnoistraživačku saradnju sa drugom naučnoistraživačkom institucijom iz Bosne i Hercegovine ili iz druge države,

- § institucije čije je projekte ranije finansiralo/sufinansiralo Federalno ministarstvo obrazovanja i nauke, a koje prilože dokaz da su rezultati tog naučnoistraživačkog rada objavljeni na način kako je to predviđeno ovim konkursom i koji su opravdali dodijeljena sredstva.
9. Voditelj/voditeljica odobrenog projekta i predlagač (institucija) su dužni podnijeti detaljan finansijski izvještaj o namjenskom utrošku sredstava u skladu sa odobrenim finansijskim planom, kao i izvještaj o toku i naučnim rezultatima projekta, Federalnom ministarstvu obrazovanja i nauke, u roku od 30 dana od dana završetka projekta.
 10. Pozitivna ocjena Federalnog ministarstva obrazovanja i nauke o postizanju utvrđenih ciljeva izvršenog projekta, zasnovana na mišljenju Savjeta za nauku i namjenskom utrošku odobrenih sredstava, biće referenca za buduće finansiranje naučnoistraživačkih projekata istog naučnoistraživačkog tima, odnosno njegovih članova, od strane Federalnog ministarstva obrazovanja i nauke.
 11. Projekat će se smatrati uspješno završenim ako naučnoistraživački tim u roku od 1 godine od dana završetka projekta objavi rezultate projekta (bar jedan naučni rad iz uže oblasti u koju spada projekat) u nekom od referentnih časopisa obuhvaćenih sa „Web of Science“ (baze CC, SCI EXPANDED i sl.) i „proceedings-ima“- zbornicima radova sa referentnih konferencija. Pod „objavljenim radom“ smatrat će se i dokaz da je rad prihvaćen i da je u toku postupak njegovog objavljivanja. Prava na rezultate istraživanja, kao i prava na njihovo objavljivanje, intelektualna, vlasnička i druga prava regulisat će se ugovorom o finansiranju/sufinansiranju i realizaciji naučnoistraživačkog projekta.
 12. Prijave se podnose u tri (3) originalna primjerka na propisanim obrascima Federalnog ministarstva obrazovanja i nauke.
 13. Konkurs ostaje otvoren 30 dana od dana objavljivanja obavještenja u dnevnim listovima: Dnevni avaz, Dnevni list i Oslobođenje, odnosno do 07.05.2010. godine. Kompletan tekst konkursa je dostupan na web stranici Ministarstva: www.fmon.gov.ba.
 14. Propisani obrasci mogu se preuzeti isključivo na web stranici Ministarstva www.fmon.gov.ba. Dodatne informacije mogu se dobiti putem e-maila: konkurs2010@fmon.gov.ba.
 15. Prijave sa priložima se podnose lično ili poštom u zatvorenoj koverti isključivo na adresu: **Federalno ministarstvo obrazovanja i nauke, Stjepana Radića 33, 88 000 Mostar**, sa naznakom „**Prijava na Konkurs za naučnoistraživačke projekte – ne otvarati**“.
 16. Nepotpune, neodgovarajuće i neblagovremeno prispjele prijave neće se uzeti u razmatranje.

MINISTRICA

Meliha Alić, prof.